

SANTIAGO KARTA

Israel ji'j mteewa jxuka ũssatx Santiago fxi'jni

1 ¹ Israel nasa doce ji'jsa naa kiwete msuuya jxuka ũssatx weçxana fxi'jaçthu Jesukristo vxite! Dxusna selpisáa Santiago yaasesa.

Dxus yakh sxiigmée fxi'zewa'ja's Dxus íiçxáak kaajiyu'ju'

² Adx yakthē'jwe'sx, nxusmée meswe weçxweçxa yajkxna ma'wēsawa thēysa vxyaatewa. ³ Mjiyuwe: Dxusa's jweeíçxáa çxhāçxha yajkxya' piyakahníçxáak txā'wē thēysa' vxya'. ⁴ Aça' thēysa vxyaatewa ũukhnuwe, txāa thēysa' i'kwe'sx kīhte yuhwa sxiigmée jxuka Dxus yakh çxhāçxha fxi'zewa'ja's kaapiya'jsa'.

⁵ Maawa Dxus yakh fxi'zewa'ja's sxiiguuççxa', Dxusa'síiçxáa mpējxwe, aça' txā' wa'lmée maatxwa jxuka kaajiyu'juna i'kwe'sx pēynite thaakwe. ⁶ Nawa kuh jwed yajkxmée ũsyujuna sūhna yuuçxáa mpējxwe. Txā'wēme!, kuh jwed yaakxsa' tee jwedteçxáa ũsmée íkh wala's wejxaa kēese'jni na'wē yuutxna. ⁷ Aça' txā'wē tee jwedçxáa yaakxsame! Dxusa' ũsuna sūhwa'j ji'phme!. ⁸ Maawa Dxusa' pasmée wáanax sūhna e'z jwed yajkxna pēysa' bagaçxte yuhwa Dxus yakhçxáa fxi'zeya' yu' ājameena.

⁹ Maa yakthē'jwa kīhwa ji'phmeesaçxawa weçxweçxa yajkxna fxi'zewa'j ji'pha', Dxusa' pu'çxhina sūhna. ¹⁰ Aça' txā'wēy ji'phsawa txajx ji'phuni pçuwa'j en pa'thewa, wēt wēt yaakxwa'j ji'pha', txāa pa'gatey naa kiwete ji'phsa' kitewa ma'wēga txaçxmeyna udxi' txā'wēysaçxá'. ¹¹ Sek açxaate!, jxūth tasxa' udxi'k, naapkaçxha' kitewa ubu'k, aça' zhiçxkwesa' kxtee pçu'k. Txā'wēy naa kiwete ji'phsawa txajx ji'phuni yakh pçuwa'jsaçxá'.

Ewmée yūuya' yaakxnisa's Dxusa' ũsu'çme'

¹² Ewmeete kweete'jwa'jsa vxyaatewa, txā'sa' nwēese'jsame' wala yuh wēt wēt yaakxwa'j ji'pha'. Txāa pa'gatey txā'wē yūusa' bagaçxte yuhwa pçumée ítxi fxi'zewa'ja's Dxus ũsya' neeyūuk txā'sa' jxpa'gawa'jsa' Dxusna nwēese'pha'ga. ¹³ Maawa ewmeete weteçxa', Dxus ne' txā'wēte wetewa'ja's vxit sūhwa'jme!. Dxusa' ewmeete wetewa'ja's bagaçxte yuhwa

ũsmeena. Txã' ewmée yũusame'. ¹⁴Wejxwa peekx ũus ewmée yaakxni's nwēese'pha'gaçxáatx ewmeete wetena pa'ja'. ¹⁵Na'wē ewmée ũus yaakxnik pkalte kweete'je', aça' txãa pkalku jweefiçxáa walaana u'jçxa nmehte' uuwa'jçxáa vxitna pa'ja'.

¹⁶Yakthê'jwe'sx mjiyuwe: ¹⁷Na'wē Dxusa' cielute eena' kweethsatx jxuka vxitku sa' txã' açxpkaçx le'çxkweçxáa yuhwa yu'pthehmée ũsa', aça' txajx tasuxçaçxáa yuusata' kîhwa ewsa yu' jxuka. ¹⁸Txãak kwe'sxtxi peeygãhçxa txajx yuwe isasa's pta'sxçxa ewte fxi'zewa'ja's ũs, kwe'sx nyafxte txãa yakh utxasáa yuukahn.

Dxus yuwe ma'wē jxkaathe' kxtey yuusaaçxáa Dxus yakh fxi'zesa'

¹⁹Txãa pa'ga adx yakthê'jwe'sx kîhwa pta'sxni ewsa yu'sa' bagaçxtewa wa'lmée jxpa'gaya'çxáa meswe. Nawa we'wewa'j yu'sa' ũus yajkçxa jxpa'yajkx mwe'wewe, sa' ũusçxawa'j yu'sa' wejx wala mpa'yajkxwe.

²⁰Txã'wēme', ũusçxanisa' Dxus dxi'pte ewmeesa', aça' Dxusa' txã'wēsa' jxpa'ga'çme'. ²¹Txãa pa'ga kîhwa ewmeesa nakwe wala pehnaya' duda' txãa yu'sa' jxuka nvxihtçxa, Dxus yuwe ewsa pta'sxni yuuk txã'sçxáana wa'lmée ũuste myu'akhwe. Dxus pta'sxni' i'kwe'sx ũusa's nwe'weya' ajawa'jsa'.

²²Nawa Dxus yuwe ma'wē jxkaathe' txã'sa' kxtey myuuwe. Wēse'jsaçxáa yu' yuunuwe. I'kwe'sxa' jxpubanuwe. Īneeçxáa wēse'jnisa' kxulsa'. ²³Maawa txã'wē Dxus pta'sxni's kxtey yuumée ĩneeçxáa wēse'jsa', peekx dxi'pa's speejute thegçxa ²⁴khũçxte uyçxawa txãa dudtey khukhmée u'jyã'jçxa' ma'wē peçxkanakx txã'wēysa'. ²⁵Nawa wēse'jçxa peçxkanamée, Dxus ley ewte nvxiit-sa jxkaahni's kxtey nwēese'jsa', jxpubamée wēt fxi'zena Dxus jxkaahni's nwēese'jna.

²⁶Maawa Dxus dxi'pte ewsath sũhçxawa ma'wēwa we'weni's jxpa'yakxmeeçxa', peekfiçxáa jxpubasáa yuuna. Aça' Dxus dxi'pte ew fxi'zesath sũhni' kxul yuh yuuna. ²⁷Dxus dxi'pte kîhte yuhwa jxpubamée ew fxi'zesa' na'wē yũuwa'ja': Nmi' ji'phmée puuplesatx pu'çxna nxuste fxi'zesatx kvxiisxa'jna luuçx wakçxahtxwa txã'wēy yũuwa'ja', sa' naa kiwete ewmeesa peekx ũuste khēewe'sxte wala jxpa'yakxwa'ja'.

Nasa ma'wēsaxwa txãa na'wēçxaçxáa ew yũuwa'ja'

2 ¹Adx yakthê'jwe'sx i'kwe'sxa' Jesukristo txakwe ewsana ũuste jxpa'gayã'jçxa', nasa maatxwa puutx ja'daçxah txãa na'wēçxaçxáa ew yũuwa'j ji'phi'kwe. ²Meeçxawa na'wē wáa yuune'kwe: I'kwe'sx pkhaakheni yatte teeçx piçthê'j ropa wala ewsa athçxa, vxyuu bee sultxhikha paatçxa u'kana, naapkaçxha' vxitewa pa'jana kîhwa ji'phmée ropa ũisxkwesa athçxa. ³Aça' txãa ropa ewsa ĩjxũusa's ew jxpa'gaçxa kaçxni ewsate kaçx kajane'kwe. Nawa kîhwa ji'phmée pxthaakuēesa's yu': Ayte myuju meeçxa' kxtee kiwete mkaaçx jĩne'kwe. ⁴Txã'wē

yũuçxa', puutx ja'daçxah txãa na'wẽçxaçxãa ew yũusamée, vxite yu'sa' açeyaakxsaçxa txã'wẽ yuune'kwe.

⁵Adx yakhthẽ'jwe'sx ew mwẽese'jwe: Naa kiwete makwe kĩhwa ji'phmée pxthaakuẽesaçxawa txãawe'sxa' Dxusa's yu' ma'wẽçxãa yuhwa peçxkanamée ùste yajkxna fxi'zeçxa Dxus jxkaahna ùsnitewe'sxa's Dxusí ùsya' neeyũuk Dxusna yaakxsatxi' txã'sna jxpa'gawa'jsata'.

⁶Txã'wẽtewa, i'kwe'sx yu' txãa ji'phmée pxthaakuẽesatxi' weeçxçxa ji'phsaçxáatx i'kwe ew we'we'. Nawa ji'phsaíçxãa i'kwe'sxtxi pkxuuçxa çkhuẽs tasxsu kuutxa'jsamée wáatxna? ⁷Txãawe'sxiçxãa Kristo yase's çaçewe'wesamée wáatxna?

⁸Dxus ley maatewa thaakwesa we'weçxa': Vxite nasatxwa peeygãawa'ja' idx ma'wẽga ya'peeygãja' txã'wẽyçxãa jĩ'k. Aça' txã'sa' kxtey nwẽese'jna fxi'zeçxa', ewsaçxah txã'wẽ yuune'kwe.

⁹Nawa maatxwa jxuka txãa na'wẽçxaçxãa ew yũumeeçxa', pkalte weteene'kwe, sa' Dxus jxkaahni leya's yuuwesa yuune'kwe, leya's jxuka nwẽese'pha'gamée. ¹⁰Maawa Dxus jxkaahni leya's ew yuh nwẽese'jçxawa teeçx ahte le'çxkuẽçxãawa jxpubaana aça' txãa pa'gaçxãa Dxus jxkaahni ley makwetewa jxukak yuuwesa yu'. ¹¹Miiyajkxwe wakx Dxus leya' na'wẽk we'we': Ptamsayã'ja' vxitesa yakh pkal yuuwa'jme' jĩ'k. Sa' nasanawa ikhwa'jme' jĩnak jxkaaja'. Txã'wẽ yã'the', nasa yu's ikhmeeçxawa, vxitesa yakh yu' pkal yuuwãana aça' txãa pa'gaçxãa Dxus jxkaahni ley makwetewa jxuka nwẽese'jsamée yuuna. ¹²Txãa pa'ga i'kwe'sxa' we'wewa'j ma'k yuu, meeçxa' ùus yaakxni yakhçxãa ma'k yuu, nawa wala jxpa'yakxmeete', i'kwe'sxtxi nwe'wesa leya' kastigaĩna. ¹³Vxitetx peeygãhmée fxi'zesatxi' txã'wẽy Dxuswa txãawe'sxtxi' peeygãhmée kastigaĩna. Nawa vxitetx peeygãhna fxi'zesatxi' Dxuswa peeygãhçxa kastigaĩmena.

Dxusa's yaakxsath jĩsa' ãate kaavxya'ja'jwa'ja'

¹⁴Adx yakhthẽ'jwe'sx miiyajkxwe: Maawa Dxus yakh fxi'zesath jĩçxawa ew yũuna fxi'zeni yakh kaavxya'ja'jmeete', txã'wẽ yuwejuçxãa we'weniçxãa çseelpimanx? ¹⁵Na'wẽ ùus yaakiga: Maa yakhthẽ'jwa ropa ji'phmée txã'wẽy ù'wa'jwa peejxsa ùsuna, ¹⁶aça' txã'wẽsa's i'kwe'sxa' uyçxa': Pxthaaga yuuna fxi'ze'. Nawa açxha' wẽemée kumamée ew mfxi'ze jĩçxawa, txajx kakwete peejini's kĩhçxãawa kaatu'jmeeçxa yuwejuçxãa txã'jĩni' çkĩhçxã' selpiima'k? ¹⁷Txã'wẽ Dxus yakh fxi'zesath jĩsa' ãate kaavxya'ja'jwa'ja'. Txã'wẽme', yuwejuçxãa txã'jĩnisa' kxul yuja'.

¹⁸Nawa na'jĩwáatxna: Iidxa' Dxus yakh fxi'zesaçxa', çma'wẽ kaajiyu'juki'g Dxus yakh yuh fxi'zesan sũjkahn? Aça' kĩhwa yũumeeçxawa mkaajiyu'j aan ãjane'ga. Aça' adxa' ew yũuna pu'çxnisa yakhçxãa Dxus yakh fxi'zeni's ãate kaavxya'ja'jya' ãja'nja jĩtxna. ¹⁹Iidxa' teeçx Dxusçxãa cielute ùstewa txã'sa' ew jiine'ga ùste. Txã'wẽ yũuni'

ew yuja'. Nawa eçxthê'jwa Dxus ũste ew jiita' idx na'wëy. Txã'wëçxafiitx ũukhna yaya'. ²⁰ ¿Ma'wëtega jiyu'çméé? Yuwejuçxáa Dxus yakh fxi'zesath jïni' kxul yuh yuuna, Dxus yakh fxi'zeni's äate kaavxya'ja'jmeete yu'. ²¹ Kwe'sx yaçgathê'j Abrahana' Dxusna yaakxni's äate kaavxya'ja'jna txajx nçxi'k Isaakha's altalte ikhya'wak yu'. Txã'wë Dxusna yaakxni's äate kaavxya'ja'pha'ga, Abrahana's Dxusa' yuuwemeesak vxit. ²² Äçxha' çjiyugá'? Abrahana' äate kaavxya'ja'kh Dxusna yaakxni's sa' yuwejuçxáa Dxusna yaaki'th jïméé, Dxusa's ũsuh jxuka yajkxçxa äate kaavxya'ja'kh. ²³ Abrahana' Dxusa's ũsuh jxuka yajkxçxa kxtey yuupa'ga, Dxus librute na'wëk fxi'jni neeyüu: Abrahana' Dxus dxi'pte ewtek neeyüu jïna. Sa' txã'wëy Abrahana' Dxus namiku' jïnik neeyüu.

²⁴ Äçxha' jiyui'kwe, yuwejuçxáa Dxusa's yaaki'th jïméé, Dxusna yaakiççxa' äate kaavxya'ja'jwa'ja'. ²⁵ U'y kazx yuusáa Rahabwa Dxusna yaakxni's äate kaavxya'ja'kh na'wë yüuna: Txajx yatte piçthê'j peethegu'na pa'jsatx jxpa'gaçxa', txãa piçthê'jtx nwe'weçxa vxitee dxi'jsuk kaah txãa u'ya'. Aça' txã'wë ew yüupa'ga txã'sa' Dxus dxi'pte ewtek neeyüu. ²⁶ Kwe'sx kakwewa ma'wëga ũus ji'phmeeçxa' uuní yu', txã'wëy Dxusna yaaki'th jïnisa' seelpimeesa', ew yüuna pu'çxnisa yakh äate kaavxya'ja'jmeete yu'.

Kwe'sx thune' na'wësa'

3 ¹ Adx yakthê'jwe'sx, maawa jxuka kaapiya'jsaçxa' jïisatha'w sühçxa nuywe'wenuwe. Kaapiya'jsaçxawa jxpa'yajkx mfxi'zewe. Txã'wëme', kaapiya'jsafiçxáa thaakwe yuuwesa yu'nja'w. ² Maa yuhwa jiisa yu' meetha'w. Txãasa íitha'w kíhtewa jxuka jxpuba'. Nawa maawa txajx we'weni's jxpa'yakxya' äjana txã' ewsaçxah txã'wë yuuna. Sa' txã'wë yüuçxa', txajx kakwe'swa jxuka neeweya' äjana. ³ Nwëese'khantha'w jiba yuwete fxrenu paathe', aça' txã'wë yüuçxa' jiba kakwe's ewsu kaajxa' äja'tha'w. ⁴ Mjiyuwe, barko txakwe seena' walasa's wejxa wala fxius jxüna u'juçtewa, barko's kaahsa' timon le'çxkwesajuçxáa tuphyna ku'lek kaja'. Aça' barko txakwe seena' walasaçxawa nwëese'je'k ma'wë kaathewa. ⁵ Txã'wëy kwe'sx kakwete thune wala le'çxkuëesa ji'ptha'w, nawa seena' yuh walasa na'wë we'weya' çxhãçxha'. Txã'wëy ipx makwe le'çxkuëesaçxawa, yu'kh makwe seena' walatewa jxuka kabuna. ⁶ Kwe'sx thunewa ipx na'wëysaçxá', kwe'sx kakwe's jxuka suwçxa naa kiwetewa jxuka äawa'jsa's kwe'sx kakwete ki'pni ji'ptha'w. Bagaçxte yuhwa ũçxhamée infxiernote ipx na'wësa'. ⁷ Yu'kh niimal vxite' äega fxuusa vxite' yu'gawe'sx eçx ma'wë seena' juuna'satxwa nasa' kaastxaja'jya' äja'tx. ⁸ Nawa thune yu'sa' kim yuhwa kaastxaja'jya' äja'çmeeta'. Txã' weneno ikhsa', txãa pa'ga kaastxaja'jya' ya'äja'çme'. ⁹ Txãa thuneju Dxus kwe'sx Tatanawa weçxana tuuthe'je'tha'w, sa' txãa thunejujxçxáa nasatxwa wëesxuna ewméé açewe'we'tha'w Dxus taki'jçxa nvxiitnisatx.

¹⁰Adx yakhthê'jwe'sx, txã'wê yu' txãa yuwejujçxáa Dxusna tuuthe'jna ki' açewe'wena yuuwa'ljme'. ¹¹Teeçx yu'îçteçxáa yu' sxūusa kasehna ki' yu' yaasawa çkasehma'k? ¹²Adx yakhthê'jwe'sx, miijajkxwe: Sxlala tasxa' çuhçe yūnya' ājama'k? Aça' uçe tasxa' çsxlala yūnya' ājama'k? Txã'wêy teeçx yu'îçteçxáa yu' e'z jwed kasejxa' ājaçme'.

Na'wê yuunisaçxáa kíhtewa wala jiisa yuunisa'

¹³I'kwe'sx ksxavxyte kíhtewa wala jiisa ūsçxa', kíhtewa puimée zhiçxkwe fxi'zewa'ja's mkaavxya'ja'jwe. Txã'wê wala jiisa' kíhtewa juuna' iijewçx yajkxna fxi'zewa'ljme'. ¹⁴Nawa i'kwe'sx ūuste ewmée yajkxçxa pui'nja sūhna yaakxsa' txã'wê wala jiith sūhna iijewçx yaakxwa'lj j'i'phme'. Txã'wê yaakxsa' kíhte yuhwa jiimeesa isxiisa yuuna. ¹⁵Txã'wê ewmée yūuwa'ljçxáa ūusuthenisa' Dxus kaaūusuthe'jnime'. Naa kiwetewe'sx peekx i'kwe'sx ūus yaakxnisaçxá' eçxthê'j kaaūusuthe'jnisa. ¹⁶Mteewa iijewçx yaakxwa'lj kasehnijū' puiiwa'ljçxáak vxya'. Aça' txajūyā'j yu' jxuka suweena ewmeesaçxaxáak kaseje'. ¹⁷Nawa Dxus kaaūusuthe'jni's j'i'phsa' kíhtewa pka'l yuumée fxi'zena, ewçxáa yūuna, puimée nasatx peeygāhna, isxiimée isa we'wena. ¹⁸Aça' puimée ewçxáa yūuna fxi'zewa'ja's pa'pçxusa' ew wēt fxi'zewa'ja's uyuuna.

Naa kiwetewe'sxa's selpiite', na'wêk ya'yu'

4 ¹I'kwe'sx pwe'sx puui jxpakwena fxi'zeni' çmajūga kaseje'? I'kwe'sx ūusujk kaseje', ewmée yūuwa'ja's yaakxpa'ga. ²Vxitee j'i'phunitx iiyamu wēeçxawa ājameeçxa', ikhya'çxáa i'kwe yaaki'. Vxite nasa kíhçxáawa j'i'phte', txã'sna kusa'jya' ājameeçxa', puuiya'çxáa i'kwe pa'pçxu'. I'kwe'sx peejini's Dxusna pējxmeeçxa i'kwe uyya' āja'çmée. ³Pējçxawa, jxpa'gaya' yu' āja'çmée i'kwe, txã'wê ewmeete kseelpi'jya'çxáa pēypa'ga. ⁴Dxus yakh weh yuhwa ewmée fxi'zesa mwēese'ljwe: Naa kiwetewe'sxa's selpiina fxi'zesa' Dxus yakh puinisate jiimeewá'kwe. Maawa naa kiwetewe'sx yakhçxáa wēt fxi'zeya' yaakxsa' Dxus yakh puuisak yu'. ⁵Txã'wētewa, kwe'sx ūuste nvxiitnisa Dxus Espiritu' wala kçxhāaçxha'jna ūsa' jī'k Dxus libroute fxi'jnisa' txã' isxiinisame'. ⁶Naapkaçxha' Dxusa' jweeíçxáak kwe'sxtxi peeygāhçxa pu'çxhi' kíhtewa. Txajīk Dxus libru' na'wê pta'sxi': Dxusa' pu'çxhi'çme' iijewçx yaakxsatxi', nawa iijewçx yajkxmée fxi'zesatxi' wala peeygāhna pu'çxhina jī'k. ⁷Txãa pa'ga Dxusçxáana nwēese'ljçxa eçxthê'ja's nwēese'jmée çxhāçxha miijajkxwe, aça' eçxthê'ja' i'kwe'sx tasxu ājameeçxa txuteena u'ljwena. ⁸Dxus tasxte mutxaawe, aça' txāawa i'kwe'sx yakh utxaana. Pkalsawe'sx, ewmée yūuni kusetx miiaatewe. Txã'wêy Dxusa'sçxáa yajkxmée e'z jwed yaakxsa i'kwe'sx ūusa's miiaatewe. ⁹Sa' txã'wê āhmeene'tka'w yūu sūhna miijajkxwe, sa' sxijkana fxi'zepa'ga āçxha' ū'newa'ja's miijajkxwe, sa' weçxana

fxi'zepa'ga ãçxha' nxuswa'ja's miiyajxwe. ¹⁰ Ñçxha' Dxus dxi'pte seena' yuh ãhmeekwesa myuuwe, aça' txã'wẽ yũusa's walasa vxituna Dxusa'.

Yakhthê'jwe'sxtxi ewmée nuywe'weni

¹¹ Yakhthê'jwe'sx, i'kwe'sx pwe'sx puutx ewmée ya'nuywe'wenuwe. Maawa yakhthê'ja's ewmée nuywe'wesa' Dxus jxkaahni ley peeygãawa'ja's we'we'k txã'sna weeçxa yuuna. Aça' Dxus jxkaahni leya's weeçxa' txãa leya's nwēese'jepkaçxte leya's jxkaahsa na'wēsa yuuna. ¹² Txãa pa'gatey leya's nvxiit-sa' teeçx yuuçxáa ũsa'. Txãaíçxáa ewmeete nvxiitwa'jsa' sa' txãaíçxáa ki' nwe'weya'wa ãjawa'jsa'. Txã'wēte', çidxçxáa jwee kimçxaga txã'wẽ yakhthê'jwe'sxtxi' ewmée nuywe'we'?

Kuskuskhê' kîh yuuya'watewa jiimeek ya'fxi'ze'

¹³ Ñçxha' i'kwe'sx na'wẽ we'we'i'kwe txã's mjiyuwe: I'kwe'sx we'weçxa': Ñçxh u'jmeeçxa' kuskusa' u'jwe'nja'w çxhab walan. Kxtee pa'jçxa teeçx anxu mjiiçxa vxyu wala knayna ũsu'nja'w jî'i'kwe. ¹⁴ Nawa kuskus fxi'zewa'ja's jimee i'kwe. Kwe'sx itxi fxi'zeni' na'wēsaçxá': Yu' ahwa ma'wēga tudteçxáa vxyaça' ãekhēe pçu', txã'wēysaçxá' itxi fxi'zenisa'. ¹⁵ Txãa pa'ga na'wēçxáa yaakxwa'ja': itxi fxi'zewa'j Dxus peesuwána aça' ma'wēçxáawa mji'nja'w jîwa'ja'. ¹⁶ Nawa txã'wẽ yajxkmée ũste iiweçxçxáa i'kwe yajkçxça we'we'. Txã'wẽ yajkçxça we'wenisawa ewmeesafíçxá'. ¹⁷ Maawa ew yũuwa'ja's jiiçxa ew yũumeeçxa', Dxus dxi'pte yuuwesa yuuna.

Ji'phsawe'sx mpa'yajxwe

5 ¹ Ñçxha' wala ji'phsawe'sx mwēese'jwe: I'kwe'sx ji'phuni pçuute seena' yuh nxussa pa'jana txã'sna yajkçxça weyna mpebeewe. ² I'kwe'sx ji'phunisa' kîh yuhwa seelpime' jxuka wa'wani', aça' i'kwe'sx ropa ewsawa txã'wēy jxuka wes ũ'ni'. ³ I'kwe'sx vxyuu beh vxyuu çxihmewa jxuka iz ũ'ni', aça' txãa vxyu iz ũ'nisafíçxáa i'kwe'sxtxi' seena' wala ewmée nxus kiwete akhwa'jsa'. Txãa vxyu' i'kwe'sxtxi ivxiituya'wa' ipx na'wẽ. Naa nmeh ensu' i'kwe'sx ji'phuni's iiméh wala jxaaw i'kwe. ⁴ I'kwe'sx uuthasxte mjiiisa yuul pēyni's Dxus cielute jxkaahna ũssa' wēse'kh, aça' i'kwe'sx piuntxi yuulunisa txã'wẽ i'kwe'sxtxi ewmeete nvxiht-ya'wa'. ⁵ I'kwe'sxa' naa kiwete ji'phunisa yakh wala wēt weçxana fxi'ze'i'kwe tajkx na'wẽ niisxna txãa pa'ga ikhwa'j en pa'jya'wa'. ⁶ Nasa ewmeesata' jiiçxa i'kwe'sxa' ewteçxah ikhe'i'kwe yuuwemeesatewa, aça' txãawe'sxa' kxulteçxáa uuwa'ja's ji'phu'tx.

Thēysa pa'thewa nxusmée fxi'zeni, txã'wēy ãça'sa pa'gatewa Dxus yakh puutx we'wena

⁷ Txã'wẽ pkxuuctewa, yakhthê'jwe'sx nxusmée çxhãçxha miiyajxwe, kwe'sxtxi jxpe'jsa Jesukristo naa kiwete kîhpkaçx. Ma'wēga mjiiisawa

uhçxa' kuçxwa'jmée üythasu', nus en skhēwte', ū'a's wala pkhakhe'nja sūhna. ⁸I'kwe'sxwa txā'wēy kuçx yajkxmée çxhāçxha yajkxna mūythaswe. Txā'wēme', kwe'sxtxi jxpe'jsa Jesukristo kīiwa'ja' utxaaça'. ⁹Yakhthē'jwe'sx, puutx ūusçxawe'wena fxi'zenuwe, Dxusa' i'kwe'sxtxi ewmeete nvxiitkahmen. Txā'wēme', yuwee ku'le'sa khuēs pa'jwa'j en utxa yā'j ūsa'. Txā' Dxusa'. ¹⁰Txāniitey Dxus yuwe's pta'sxsawe'sxwa ma'wēta pxthaa yuuna fxi'zeçxawa Dxusçxáana yajkxna fxi'ze', txā'wēy thēysa nxuswa'j vxyaatewa, Dxusçxáana yajkxna mfxi'zewe yakhthē'jwe'sx. ¹¹Txā'wē pxthaa nxuste fxi'zesatxi' Dxus yakh wēt fxi'zesata' jī'tha'w. Job pxthaa nxuste wantāyna fxi'zete', nmehte' Dxusa' wala peeygāhçxa pu'çxni's iiwēse'ji'kwe i'kwe'sxa'. Dxusa' peeygāasa', txāasa pu'çxya' ūsa'. ¹²Adx yakhthē'jwe'sx, wala mpa'yajkxwe. Isasa's jiiçxa' jiith jīwa'jçxá', sa' jiimeeçxa' jiimeeth jīwa'jçxá'. Txā'wē Dxus uyte jiimeeth jīwa'jme', sa' cielu kiwe txā'wēsaxwa kxsusna pta'sxwa'jme', Dxusa' ewmeete nvxiitkahmen.

¹³I'kwe'sx pwe'sx maawa nxuste fxi'zena ūsçxa', Dxusçxáana neewe'wena meswe. Maawa wēt fxi'zena ūsçxa', Dxusa's weçxana memna meswe. ¹⁴Maawa akate uuya' ūsçxa', ancianowe'sxtxi mpa'yawe, açá' txāawe'sxa' Dxus kusete neewe'weçxa aceite ki'putxna. ¹⁵Txā'wē Dxusa' pu'çxhina sūhçxa oraite', āça'sa pkala' peltunāyni yuute, āça'sa' ewte neeyūuna, txajū' Dxusa' nuykatxhina. ¹⁶Dxus dxi'pte āhmée yūuni's puutx ya'mpeeta'sxwe, açá' Dxusa's yakhthē'jwe'sx neewe'wete', āça'sa' katxhine'kwe. Dxusna nwēese'jsa txā'wē ūusuh jxuka Dxusna yajkxçxa neewe'weni', kīhtewa jxuka pu'çxwa'jsa'. ¹⁷Ma'wēga Dxus yuwe pta'sxsa Eliaswa kwe'sx na'wēysaçxáaçxawa, nus pa'khamen Dxusna ūusuh jxuka yajkxçxa neewe'we, açá' nus pa'jme' tekh anxu y medio āhpkaçx. ¹⁸Txajū' ki'kin Dxusna neewe'wek nus kīikahn, açá' naa kiwete ki' nus pa'the', uuthasx çxhāçxhatx.

¹⁹⁻²⁰Adx yakhthē'jwe'sx mjiyuwe: I'kwe'sx maawa Dxus dxi'pte jxpubate', jxpubasame' txāa jxpubasa's ewmée dxi'ju kaasxwedu'juna. Sa' txā'wē yūuçxa' jxpubasá ūus jxukate vxituwa'j yā'j ūstewa, nwe'wesa yuuna, sa' maazkuēe pkaltxiwa kaapeltunā'jsa yuuna.